

元史新編

元史卷十五

后妃

昔者先王慮賈魚姑進

於是建陰教之職掌

嚴宮闈之名分以閑內外立紀綱而風化天下然三代漢唐以來猶世有妲褒呂趙武韋楊張之禍蓋緣粉飾具文無裨實效如此也何況有元沿朔漠之俗泯嫡庶尊卑被寵者皆曰皇后次日妃子皇子多稱太子王女亦曰公主叔母亦稱太皇太后中葉後始事冊立告廟而竝匹如故曠然無復禮坊文物之閑然當太宗定宗末六載無君黃裳尸位國枋旁落竟無譖害篡奪之患易世以後卒得并吞四海久而後亡何哉前代宮闈之禍必宦官外戚表裏煬煽乃能助虐階亂元法內庭給事多用貴臣子弟又統

以大臣而宦豎無權至外戚世家則惟守藩封食租賦奉朝請而已是以中宮閒撓國枋而皇綱不遽傾覆蓋亦治之少得其道名不足而實尙畱焉兼以陰山閒氣淑多於慝氈帳淳俗質勝其文其名號止有后妃二等分主帳殿食邑賦稅餘惟歲賜無他紛華以接其目豔妖以詭其情是以一代宮闈女德風徽視前代反有過之無不及武宗始改其舊全從漢習蕩啟王心順帝從而甚之國遂陵夷斯亦萬世之龜鑑也婦女不出閨門而元初臣下皆名其后延祐間禮部主事曾元用言后爲天下母豈可直稱其名空早加徽號以章懿德而未能頓改至順元年敕累朝宮分官署凡文移毋得輒稱皇后止稱某位下嬪子而往昔所失不能更正舊史后妃諸傳舛漏事實而繁衍冊文

又別爲一表益充無當用爲增損成篇皆舍名書氏惟氏失者乃不得已書名稍減野人之譏云

太祖母宣懿太后斡勒忽訥氏諱訶額倫先爲蔑里吉部酋弟婦方出嫁烈祖軍遇於野奪得之生太祖及皇弟合薩爾大王合赤溫大王帖木格大王帖木倫長公主烈祖沒太祖甫九歲時俺巴海汗之子泰赤烏爲部長而俺巴海汗二夫人與后宴食饗人供馬湏弗均二夫人怒明日移帳去遂絕近侍多叛附泰赤烏以去后疾騎持兵追還太半後卒叛往太祖少長又爲泰赤烏部虜去幾死又爲蔑里吉部來尋仇全家急遁入山幾不免后沈毅仁惠有智略從危險傾覆中撫長太祖兄弟輒參決軍旅以太祖性剛果於般戮恆戒飭之太祖爲合罕時札木合以釁率

十三部來攻太祖亦分部人爲十三翼迎之太后與諸王爲一翼以戰太祖卽尊位分太后與季弟帖木格其部下萬人而舊臣蒙力克父子恃寵橫恣嘗與皇弟合薩爾有隙遂假爲長生天神言諧合薩爾當有天下密勸除之太祖遂夜召執合薩爾太后聞之馳至太祖帳中盛氣詬讓出兩乳迷撫養諸子舊事太祖惶恐乃釋合薩爾猶陰奪前賜部眾二千餘語詳諸王傳二年崩世祖至元三年定廟制世次追上尊諡祔烈祖爲太廟第一室

太祖光獻翼聖皇后弘吉剌氏父名特因賜號薛禪故名特薛禪帝幼時烈祖攜往舅氏家乞婚與特薛禪遇特薛禪奇帝儀表曰昨夢白海青挾日月飛集吾掌今是子雙日光炯照人殆其祥邪遂以后許帝畱止其家時年九歲

烈祖將歿使蒙力克召帝還及帝成立後從泰赤烏部脫
歸薛禪乃以後歸帝未幾帝爲蔑里吉部夜襲破掠后去
當兵至時有媼聞兵馬聲震動亟呼太后與帝兄弟起乘
馬逸后無馬藏牛車中馳至山隘軸折爲所獲帝尋借克
烈部札荅刺部兵往攻得后以歸與札荅刺部共屯歲餘
其部長札木合有違言后聞之趣帝速行舊史帝征高麗
納其女察合於
軍中左右聞后有違言帝始引軍去攻本紀六年攻金并
無伐高麗事惟十三年帝自征夏命哈真札刺討契丹六
哥於高麗江東城降之高麗王瞰遂降請歲貢方物帝實
未嘗自行也外國高麗傳亦同此必舊史之誤今正之
先是強臣蒙力克父子譖害皇弟合薩爾賴太后救免後
皇弟鐵木格復爲其所辱泣訴於帝后助發其罪始誅廢
其父子語詳諸王傳后生太宗及朮赤大王察合台大王
拖雷大王后父薛禪弟按陳別詳勳戚傳終元世弘吉刺

氏女爲后者十八人男尙主者十一人尊顯莫竝皆敗於
后世祖至元二年追上尊諡曰光獻附太祖廟武宗至大
二年加諡翼聖又有忽蘭后者兀洼思氏蔑里吉部人初
弘吉剌后爲蔑里吉部所虜去帝起兵報復克之后父先
降納女於帝取有寵帝征回回部數年皆從云又有耶速
皇后塔塔爾部人也其後以部爲氏始帝克其部時納后
妹耶速干爲夫人有寵夫人因言有姊尤美勸帝於部中
求之已而后至夫人遂以位讓之尋封爲后而耶速干復
爲夫人后嘗從征十四年帝將征回回部后請曰兵戰凶
事帝遠涉山川諸子皆將兵他征一旦不諱誰爲嗣者願
以告部眾帝大驚曰此大事諸子親臣莫有言者微汝幾
忘由是遂定立太宗久之從征西夏帝道獵騎馬驚墜違

豫后與舊臣脫侖力勸班師帝必欲滅夏雖不從后而心以爲忠既克夏乃厚賜脫侖盡以其國人賜后是年帝崩后妹耶速干後亦封爲后又有合荅安后遜都思氏泰赤烏部人功臣赤老溫妹也初帝爲泰赤烏部所獲將加害逃至其家藏羊毛車中敵搜至其家后詭詞脫帝於難事詳赤老溫傳及帝爲合罕擊破泰赤烏部后逃山谷中軍行過其下后望見亟呼帝名帝使人問之自言我合荅安也夫爲大軍所執將殺冒死求救帝遽命釋之已死乃以舊恩納焉又公主皇后者完顏氏金廢帝衛紹王女也金宣宗貞祐二年大軍圍燕京三月金主遣使求和議婚公主竝大臣爲質乃遣使詣金選女時金諸帝公主見在者七人惟廢帝衛王少女小姐姐取秀慧使者以爲請金主

許之使者遂拜公主於階下竝請公主北鄉其國遙拜主不敢拒於是金人送主來歸并遣從嫁護駕將十人細軍百人童男女各五百采繡衣三千御馬三千匹金寶稱是儀甚盛公主母欽聖夫人袁氏亦隨至焉班師歸國人耀之皆呼曰公主皇后太祖十七年長春真人上處機徵詣行在過和林時奉太皇后旨過河其漢夏兩公主皇后皆遣送寒具等食漢公主爲金主女與夏國公主各分庭帳其後太宗世汴京降尙以衛紹王太子梁王承恪降表亦以其妹公主在朝故云

右本南遷錄

太祖后妃四十餘人自弘吉剌太皇后外取貴者曰兩公主皇后一金源氏女一西夏國王女又有高麗國王女而舊史皆改其名故不知屬何帳殿其列表者曰忽魯渾后

闊里桀担后脫忽思后帖木倫后亦憐真八刺后不顏渾
圖后忽勝海妃子此七位共居大斡爾朵忽蘭后合八眞
后亦乞刺眞后脫忽茶后耶眞妃耶里忽圖妃察眞妃合
刺眞妃此八位共居第二斡爾朵耶速后忽魯合刺后阿
失倫后圖合刺后察爾后阿昔彌失后完者忽都后渾魯
忽台妃忽魯輝妃刺伯妃此十位共居第三斡爾朵耶速
干后忽荅罕后合荅安后斡者忽思后燕里后圖干妃完
者妃金蓮妃完者台妃盧倫妃卯眞妃鎖郎合妃此十二
位共居第四斡爾朵元初起塞外無城郭宮室故襲遼制
名大帳所屯曰斡爾朵因以后妃分隸焉歷世相傳兵衛
財蓄畱朔方者領以皇子閒詔其帝后妃守之如漢唐奉
園陵故事其主斡爾朵之皇后多係各大國之女或曾與

太祖同患難諸帳勢均位敵無嫡庶高下之分惟妃稍次於后焉其中謚號世族行跡始末可略攷見者五人於右餘多闕

太宗孛剌合眞皇后無子謚闕又有昂灰二皇后太宗在潛邸時撫育憲宗爲子者也又有乞里吉忽帖尼三皇后及乃馬眞氏六皇后乃帝所掠蔑爾乞部忽都妻生定宗及闊端大王闊出大王合剌察大王四子者也闊出伐宋薨於師其子失烈門帝嘗撫於宮中稱太孫命嗣立帝崩后召耶律楚材問之楚材曰此非外姓臣所敢知有先帝遺詔在后不從遂稱制於和林者四年后不明大體舉錯任情賴耶律楚材隨時匡救梃其已甚及子定宗卽位而朝政猶出於后時楚材已歿左右用事事見本紀定宗崩

憲宗立遷后與蒙哥都於闊端所居地西蒙哥都闊端子也至元二年后薨上尊諡曰昭慈祔太宗廟又有業里訖納妃生合丹蔑里二王

定宗欽淑皇后海彌石氏帝崩后抱太孫失烈門臨朝聽政者二年先是乃馬真太后既舍太孫立定宗至是定宗崩后思踵乃馬真后故敝乃挾太宗舊命擁太孫稱制而諸王大臣不服遂共推立憲宗事見本紀憲宗立二年后與失烈門母厭禳事覺乃遷失烈門於沒脫赤地而賜后等死至元二年追諡未祔

睿宗顯懿莊聖皇后克烈氏太宗母弟拖雷妃憲宗世祖母也父札合紺字克烈部長脫里弟先降太祖從征蔑里吉有功後奔乃滿及克烈部破同乃滿蔑里吉來侵爲別

將朮赤台所俘獻女請成太祖乃納其長女奔巴合而以妃賜拖雷憲宗卽位尊皇考爲帝廟號睿宗尊妃爲皇太后二年崩睿宗又有妃乃馬真氏生撥綽大王睿宗十一子自二帝及撥綽外其母氏皆無攷世祖至元二年追上尊諡曰莊聖祔睿宗廟武宗至大二年十月加諡曰顯懿三年十月上玉冊云

憲宗貞節皇后弘吉刺氏特薛禪孫芒哥陳女也早崩至元二年追諡祔憲宗廟后初崩帝卽以其妹耶速爾繼爲后又有出卑皇后失其氏八年從征宋帝畱后居六盤山而自進攻蜀明年秋七月帝崩於釣魚山九月后亦薨又有亦乞列氏皇后昌王孛圖孫女也父瑣爾哈尙太宗子闊出女安圖公主后爲主出又有明里忽都魯皇后泰定

二年詔守班圖營帳太宗又嘗爲帝娶火魯刺部女火里
差爲妃後亦稱爲后不知所終世祖卽位元年賜先朝亦
乞列皇后幹者思皇后每位銀二千五百兩羅絨等折寶
鈔二十三錠有奇又賜先朝兀魯忽乃妃子等銀五千兩
其後歲以爲常此元代宮闈歲賜之大略也

舊史本紀作
先朝帖古倫

皇后案帖古倫乃世祖后非先朝后也今正之其所
賜各妃亦當屬先朝以表中世祖后妃無此名故

世祖后妃十人弘吉刺太皇后居大庭帳弘吉刺次皇后
弘吉刺第三后居第二庭帳塔刺海后盧罕后居第三庭
帳伯要兀真后闊闊倫后居第四庭帳又有速哥荅思后
八巴罕妃撒不忽妃皆不知所繫而速哥荅思后泰定三
年嘗詔守世祖庭帳云

世祖太皇后弘吉刺氏諱帖古倫魯王按陳孫脫憐女也

諡及崩年竝缺次昭睿順聖皇后弘吉刺氏魯王按陳女也侍帝潛邸生太子真金帝卽位中統三年立爲后至元十年三月授冊寶元世冊禮自后始尋上尊號曰貞懿昭聖順天睿文光應皇后后性仁而明達當憲宗時帝以母弟奉命南征軍鄂州而憲宗崩於蜀帝母弟阿里不哥守和林遂與其黨阿藍荅謀篡立乘傳發兵去開平僅百餘里后使人問曰發兵大事太祖曾孫真金在何故不令聞知阿藍荅不能對尋聞其黨脫里赤至燕南僉民爲兵乃密使馳報帝亟還國事始定后居中宮尤樂簡素隨事諷諫多裨國政有四怯薛官請割京師城外地爲牧場詔具圖以進后欲諫至帝前乃先陽責太保劉秉忠曰汝漢人明達者言則主聽何爲不諫初定都時以地牧馬或無不

可今軍民分業已定柰何奪之豈此外遂無牧地耶帝默然其事遂寢后嘗取太府緡帛各一帝謂此軍國所需非私家物也后自是率宮人親執女工拘諸舊弓弦練之緝爲紬製衣其鞞密可比綾綺而宣徽院羊牯皮舊棄無用后令縫爲地毯不使廢敗先是帽無前簷帝出射苦日景炫目后乃翬蓋之帝喜命爲式又製一衣前有裳無衽後長倍前無領袖綴以兩襜名曰比甲以便騎射時多倣效焉十三年宋平幼主入朝大宴眾皆歡甚后色不懌帝曰今江南旣平兵戈浸息爾何獨不樂后曰自古無千歲之國毋使吾子孫及此幸矣帝以宋府庫寶物陳列殿庭召后觀之后視卽去帝遣宦者問后所欲得后曰宋人貯蓄將以遺子孫其子孫不能保而歸於我我何取耶宋太后

全氏至大都不習風土屢求還故鄉又其故宮人安定夫人陳氏安康夫人朱氏與二小姬縊死邸中帝命縣其首全太后驚怖后屢乘閒請令南歸帝曰爾婦人無遠慮彼一國之母遺民尙在若使還江南必啟浮言非所以保全之也誠愛之者時存恤之俾毋悲羈旅耳后用是益厚待焉全太后及宮人等在九都日支羊肉千六百斤他物稱是謝太后田在江南者歲自收租及謝太后薨始以其貲產歸中宮尙有地三百六十頃俾爲世業歲免征租翰林待制王思廉嘗進讀通鑑至唐太宗怒魏徵長孫皇后朝服拜賀得賢臣事帝令內官引講官至后閣前說其事

后曰是誠有益聖衷後有類此者宜以時陳善十八年二月崩成宗卽位追上尊諡祔世祖廟又弘吉刺第三后諱

南必納陳孫仙童女也至元二十年立爲后時帝春秋高
后繼守正宮頗預政柄大臣每不得見帝輒因后白事焉
生皇子鐵蔑赤崩年與諡俱闕元代惟帝陵皆在漠北起
輦谷其諸后妃太子陵皆在獨石口北氈帽山見迺賢金
臺集

成宗母徽仁裕聖皇太后弘吉刺氏明孝皇太子妃也先
是世祖出獵道渴至一帳見女子緝駝茸從求馬湏曰馬
湏固有之但我父母諸兄皆不在我女子難以與汝世祖
欲去又曰我獨居此汝自來自去於理不宜我父母卽歸
盜姑少待須臾果歸始出馬湏飲焉世祖旣去歎息曰此
女倉猝知禮若是豈非佳婦邪後諸臣請擇太子妃俱不
當上意有老臣嘗從獵知此事且聞未字具白世祖世祖

大喜卽聘爲太子妃事中宮孝謹不離左右起居服御無纖介煩猥不周至世祖每嗟其賢一日世祖幸東宮視太子疾見織金臥褥責曰我嘗賢汝何奢靡如此邪妃跪對曰常時不敢用今以太子病恐侵溼氣乃暫陳之請卽徹去太子薨皇孫卽位是爲成宗尊皇考爲帝廟號裕宗尊母妃爲皇太后設太后官屬置徽政院後院官有受獻浙西田七百頃籍於位下太后曰江南率土皆國家所有何必私田且我一寡婦人安用是卽命中書省盡罷易其受獻者后有弟旣朝求官后曰汝非其人也勿以累我其後弟果被黜人皆服后之知人大德四年二月崩上尊諡曰裕聖祔裕宗廟葬先陵至大三年十月加諡徽仁太后生三子其三卽成宗其長曰晉王甘麻刺生泰定帝其次曰

懷王荅刺麻巴刺生武宗仁宗元一代帝者皆后子孫云
成宗貞慈靜懿皇后弘吉刺氏幹羅陳女也侍帝藩邸爲
元妃妃誕日六宮妃嬪以次獻慶禮時南朝宮人有選入
後庭者亦各有獻一寒光水玉魚一青芒雙蚪如意一潘
金簡翠腕闌元妃問何物對曰魚是太真潤肺物如意是
六朝所遺闌是建業景陽宮臙脂并物妃不說元氏掖庭記生
于德壽帝未卽位薨至大三年上尊諡祔廟及帝卽位元
貞元年繼立伯岳吾氏爲皇后駙馬脫里忽思之女也大
德三年十月授冊寶時帝多疾后居中用事然能信任相
臣哈刺合孫舉錯不撓號爲綏靜八年正月地震平陽后
召平章愛薛問曰災異如此殆下民所致耶對曰天地示
警朝廷與下民何與后然之嘗幸天壽萬寧寺見所塑祕

密佛形象詭褻惡之以帕蒙面而過卽敕毀去會帝久病無子皇姪武宗以懷寧王總兵朔方其弟仁宗在內中外人望所屬后忌之乃出仁宗於懷州明年帝崩無子后恐其兄弟立修怨召安西王阿難荅至京師謀立之丞相阿忽台等遂欲奉后垂簾聽政遣師斷懷寧王歸路而丞相哈刺合孫已密報仁宗于懷州先入以計誅阿忽台等清宮禁使迎皇兄武宗于漠北安西王旣誅并搆后以交通事遷居東安州尋賜死成宗又有乞里吉忽帖尼后失其氏

順宗昭獻元聖皇后弘吉刺氏魯王按陳孫渾都女成宗同母兄懷王荅刺麻巴刺大王元妃武宗仁宗母也大德間成宗不豫成后欲專政忌仁宗屬近與妃俱遷懷州成

宗崩仁宗奉妃還京師入內哭復出居舊邸朝夕入奠陰
平內難迎武宗卽位先是妃用陰陽家言卜兩子星命所
宜立欲武宗讓位於弟遣近臣朵爾密告曰汝兄弟皆我
子豈有親疏陰陽家所言運祚修短不容不思也武宗使
康里托托還報乃更趣召事見諸王傳旣立尊皇考爲帝
廟號順宗尊母妃爲皇太后是年冬朝於隆福宮上皇太
后冊寶至大元年三月爲太后建興聖宮當武宗鎮守邊
陲太后嘗以振旅親禱於五臺山明年正月遂復幸五臺
修佛事荅靈貺武宗亦孝敬無方殫崇禮制詔高麗王璋
從侍鑾輅備宿衛四月復立興聖宮江淮財賦總管府主
輸入三年又以興聖宮鷹房等戶四千分處遼陽建萬戶
府統之是年十月率皇太子諸王羣臣朝上徽號曰儀天

元史卷十五

列傳

十一

興聖慈仁昭懿壽元皇太后越日太后敬謝太廟武宗更緣廣恩意詔赦天下仁宗踐位加上尊號曰全德泰寧福慶皇太后英宗初立尊爲太皇太后上尊號曰徽文崇祐太皇太后是日御大明殿受朝賀越日以禮成復告廟元世諸后自非臨朝雖儷宸極其光耀莫有比焉居東朝頗仁儉宮女皆教治女工每幸上都必敕鷹房衛士先往毋害民稼性敏給有權數歷佐三朝威福已出茲佞附導遂日不檢內則黑盧母用事外則幸臣失烈門紐鄰及丞相鐵木迭爾暴黷無忌至箠辱宰相素敗綱紀仁宗每恐傷太后意容忍不窮問及英宗立羣倖誅而後稅政始革初仁宗時議立皇太子羣小說太后以武宗長子和世疎性剛察不如英宗幼謹飭易與乃共擁立之既卽位太后來

賀語及羣臣臧否欲其委任所寵帝莊毅形於色太后不
懌而去曰我固不擬立此兒也既而不得自恣遂飲恨成
疾然奸黨蟠據內外卒貽英宗成濟之禍至治二年九月
崩明年上尊諡祔順宗廟順宗爲皇孫時世祖嘗賜以待
郭氏女生魏王阿木哥仁宗朝魏王再以罪貶見宗室傳
武宗宣慈惠聖皇后弘吉剌氏名眞葛魯王按陳裔孫脫
憐子迸不刺之女也至大三年正月冊爲后無子仁宗皇
慶二年立長秋寺掌皇后宮政秩三品泰定四年某月崩
八月上尊諡弘吉剌氏世尊貴間以功名顯后祖父脫憐
世祖時授河西王府千戶賜驛券圓符各四以兵守朔方
客魯連河二十四年從族父濟寧郡王帖木爾征叛王乃
顏有功賜號拔都卒子迸不刺嗣卒后兄買住罕嗣尙王

女拜荅沙公主生二女後爲泰定帝妃卒弟字羅嗣亦尙王女泰定二年以金印封毓德王益貴寵其女後爲順帝后而買住罕孫阿失復襲千戶順帝元統二年詔立武宗廟后主丞相柏顏與羣僚議曰先朝以眞葛皇后無子不爲祔廟今所當祔者其明宗母乎抑文宗母乎時帝爲明宗長子柏顏意有在而羣臣依違莫決太常博士逮魯曾對曰眞葛皇后早膺冊寶則文明二母皆妾也今以無子之故不爲立主而以妾母爲正是爲臣而廢先君之后爲子而追封先父之妾於禮不可昔燕王慕容垂卽位追廢其母后而尊其生母配享先王爲萬世笑堯之母號慶都帝嚳庶妃堯立爲帝未聞冊以爲后而配嚳豈有宗廟大典不法堯舜而法慕容氏乎眾咸是魯曾議集賢學士陳

顯持異議而鄙悖不學引唐太宗冊巢刺王妃故事眾咸嗤之於是升祔禮定以后配焉武宗又有速哥失里后者宣慈惠聖皇后從祖姑也亦無子崩年與諡竝闕又仁獻章聖皇后亦乞列氏安西王女盧兀倫公主所出初爲帝妃生明宗天厯二年追上諡號順帝至正六年擬改諡曰莊獻嗣聖未上又文獻昭聖皇后唐兀氏生文宗天厯二年追上尊號又有完者台皇后至大中妃洪氏取寵專房宴七夕結彩樓於臺諸妃嬪不得登獨洪妃與宮官數人升樓散綵令宮人俯拾之以色豔淡爲勝負設鬪巧宴帝又於仲秋月夜與眾嬪御泛太液池中流畫鷁夾以蓮舫各設女軍左曰鳳隊右曰鶴團冠服旗旛瑰奇詭麗其蓮舫菱舫輕捷如飛有駱妃者善歌舞起爲帝謳月照臨之

曲酒酣下令女軍水戰爲戲風旋雲轉夜分乃罷太液池
在萬歲山北舊名瓊花島云武宗后妃侍從各有定制后
侍從二百八十人冠步搖泥金帽衣翻鴻獸錦袍妃侍從
二百人冠懸梁七曜巾衣雲肩絳繒袍嬪侍從八十人冠
文縠巾衣青絲縷金袍竝謂之控鸞昭儀宮中制五雲車
車有五箱以火樹爲檻軾烏棱爲輪轅頂明珠左張翠羽
蓋曳玉鈴結青錦爲層雲覆頂旁建青龍旗列磨鍰雕銀
戟五右張白鳩緝毳蓋曳金鈴結素錦爲層雲覆頂旁建
白虎旗列□□□□五前張赤羽蓋曳□鈴結赤錦爲
層雲覆頂前建朱雀旗列線鋒火金戈五後張黑兔團毫
蓋曳竹鈴結墨錦爲層雲覆頂後建玄武旗列畫干五中
張雕羽曲柄蓋曳石鈴結黃錦爲層雲覆頂建句陳旗中

箱爲帝坐外四箱爲妃嬪坐每晦夜遊幸苑中御此以行不用鐙燭元自世祖勦業宮闈氎酪不染華風成宗繼體多疾佚遊尙簡自武宗始效金明昌故事頗侈遊宴其後順帝日以荒娛沈溺詭麗遂至亡國

仁宗莊懿慈聖皇后弘吉刺氏亡其世系生英宗皇慶二年三月立爲后上冊寶遣官祭告郊廟改典內院爲中政院先帝崩英宗卽位追上尊諡附仁宗廟仁宗又有荅里麻失里后其氏失

英宗莊靜懿聖皇后亦乞列氏成宗昌國太長公主女也祖父忽憐尙憲宗女伯牙魯罕公主屢征合荅罕父阿失從討篤哇有功父子皆封昌王見勲戚傳至治元年二月冊爲后無子泰定四年六月崩隨上尊諡英宗南坡之變

典禮闕如順帝至元二年始與武宗明宗后祔廟英宗又有身八忽都魯后朵爾只班后皆不知所終

泰定帝母顯宗宣懿淑聖皇后弘吉刺氏成宗同母兄晉王甘麻刺元妃生泰定帝帝卽位尊皇考爲帝廟號顯宗追上妃諡號文宗天厯初詔毀后室顯宗又有拜海妃忽上海妃氏竝失

泰定帝弘吉刺氏皇后名八不罕魯王按陳孫幹畱察之女泰定元年三月冊爲后二年封后父爲威靖王初后侍帝藩邸生王子阿速吉巴元年立爲皇太子帝崩丞相倒刺沙立爲帝尋敗文宗入立詔徙后東安州其地多蛙朝夕聒噪后遣人諭之曰我母子避患於此何爾復不見憐邪自後屏息無蛙聲眾以爲異

見楊瑀山居新語或又以爲仁宗母后在懷州事

帝又有后七人亦憐眞八刺后亦乞列氏昌國太長公主
益里海与女二年帝嘗與后受佛戒於帝師撒荅八刺后
帝姊壽寧公主女也於帝爲甥女泰定三年納之宮中先
卒餘爲忽刺后耶速后卜顏后什烈后鐵尼后俱失其氏
有必罕后速葛荅里后皆八不罕皇后之妹弘吉刺氏千
戶買住罕女舊史謬以爲克王買住罕之女不知克王乃
帝諸父行也泰定妃嬪天厯初俱徙東安州燕帖木爾嘗
取泰定后爲夫人未知所取者何后

明宗乃蠻眞氏皇后成宗甥壽寧公主女名八不沙侍潛
邸生寧宗天厯二年明宗稱制於和林而文宗已正位大
都自往迎至旺忽察都地明宗暴崩於是文宗復踐阼是
年立寧徽寺掌后宮事又奉后鈔萬錠帛二千匹供費用

后悉出之命帝師率羣僧爲明宗修佛事於大天源延聖寺七日又命道士建醮於玉虛天寶太乙萬壽四宮及武當龍虎二山至順元年復詔有司供后宮幣二百匹四月文宗皇后知后懷南坡之痛心慚不安乃與宦者謀弑后尋崩後至元二年祔明宗廟又貞裕徽聖皇后罕祿魯氏回回阿爾斯蘭郡王之裔也初明宗爲周王時北行過阿爾斯蘭之地納焉延祐七年四月丙寅生子妥懽帖睦爾於北方卽順帝文宗旣復位內忌兄子揚言妥懽帖睦爾非明宗子初徙居高麗大青島中不與人接繼復遷廣西之靜江命奎章閣學士虞集草詔告中外事見本紀及順帝卽位後至元二年乃追上諡號或曰后故宋主瀛國公之姬也瀛國晚年爲僧徙甘州取回回女而周王亦遁往

漠北過其寺乃乞以歸生子後爲順帝詳皇子諸王傳明宗又有后六人曰按出罕后曰月魯沙后曰不顏忽都后曰野蘇后曰脫忽思后曰阿梯里行后氏皆無攷脫忽思后嘗主明宗帳殿至順二年賜湘潭戶四萬爲湯沐然文宗世但稱曰娘子不稱后云

文宗弘吉刺皇后順宗女魯國大長公主所出祖父皆封魯王見勳戚傳天祿元年立爲后二年二月授冊寶生阿刺忒納荅刺太子早薨又生燕帖古思太平訥二皇子文宗旣弑明宗自立及明宗八不沙后之崩后復與有力焉至順三年八月文宗崩丞相燕帖木爾請立燕帖古思后以文宗大漸時遺命傳位明宗子明宗長子時遷外次子懿璘質班畱京師年方七歲后貪其幼弱立焉是爲寧宗

政事一出於后是年冬奉冊寶尊后爲皇太后御興聖宮受朝賀踰月幼帝殂燕帖木爾復請立皇子燕帖古思后曰吾子尙幼明宗長子妥懽帖睦爾在廣西今十三歲矣其迎立之約後傳位燕帖古思若武仁故事明年六月卽位是爲順帝改元元統元年爲皇太后置徽政院設官三百六十六員二年上尊號曰贊天開聖仁壽徽懿昭宣皇太后後至元二年冬復上尊號曰貞文慈佑儲善衍慶福元太皇太后仍稱制臨朝先議尊爲太皇太后參政許有壬諫以爲非禮不聽時南臺御史秦不花亦奏以叔母不宜加徽稱后初聞之怒徐曰風憲有臣如此可謂能守祖宗法矣賜金幣以旌其直六年六月順帝始聞明宗非考終詔以文宗篡弑義不戴天徹其廟主并削后尊號安置

東安州并流燕帖古思於高麗后尋殂寧宗七歲卽位逾月棄世而亦有弘吉刺氏后至正二十八年薨祔寧宗廟無足言者

順帝皇后伯牙吾氏太平王燕帖木爾女也至順四年六月帝卽位七月立爲后是年冬改元元統二年授冊寶帝立非燕帖木爾意而后頗有寵后性媚黷貨時詔立鹽局官自賣鹽后亦命宦者孛羅取鹽十萬引入中政院帝又命發兩艘船下西番爲后營利至元二年后兄左丞相唐其勢與太師柏顏爭權坐謀逆誅后弟塔刺海逃入宮匿后坐下后以衣蔽之左右曳出斬首血濺后衣柏顏奏曰豈有兄弟爲逆而后黨之者遂併執后后呼帝曰陛下救我帝曰汝兄弟爲逆豈能相救時帝亦惡后驕妒故也於

是遷出宮柏顏尋鳩后於開平民舍

順帝弘吉刺皇后武宗宣慈惠聖皇后之姪毓德王孛羅女也後至元二年伯牙吾后爲柏顏所害明年三月冊爲后生皇子眞金二歲而天后性簡重節儉動中禮法待妾媵太子皆有恩時第二皇后奇氏有寵居興聖西宮帝希幸東內左右或以爲言后意無纖芥從帝巡上都次中道一夕帝欲臨幸使內官馳告后不可曰暮夜非至尊往來之候中使往復者三竟不納帝益重之至正十四年后母歿帝頗加禮賻鈔三百錠后居坤德殿終日端坐未嘗妄踰閫闕至正二十五年八月崩年四十二奇氏后見后遺衣質敝曰正宮所服何至斯邪踰月皇太子自太原歸哭極慟

順帝奇氏后者高麗人其家微故事高麗國歲獻女迄後
內白宮聞外至大家貴宦無不有高麗女子者高麗國中
亦多苦之至有生女不舉女長不敢嫁之事高麗女多慧
嫵善服事人自后入宮中主供茗飲尋見寵幸生愛猷識
理達臘皇太子時伯牙吾皇后方驕妒數箠辱之及后遇
害帝欲立焉丞相柏顏爭之以爲祖宗家法非蒙古女不
得立爲后及柏顏罷學士沙刺班希旨請立爲第二皇后
居興聖宮改徽政院后黠辯務自矯飾無事則取女孝經
史書訪問歷代皇后有賢行者爲法四方貢獻珍味非薦
太廟不敢先食京師嘗大饑命官作糜粥以振又出金銀
粟帛令宦者朴不華於都城十一門置冢瘞遺骸十餘萬
復命僧建水陸大會度之中外頗稱其賢太子旣長帝建

端本堂命儒臣教授國法帝與太子皆受佛戒帝師因啟
后曰太子向學佛法頗開悟今乃使習孔子教恐壞真性
后曰我雖居深宮不明道德嘗聞自古及今治天下者必
用孔子道佛法雖可出世不可治天下安可使太子不讀
儒書帝師慙退其後正位中宮誕日百官進箋稱賀后曰
自世祖以來正宮皇后壽誕未嘗進箋起自近歲不合典
禮卻之后善折人外輒諒謹如此帝曰荒樂晏朝不視政
后心不善之遂與太子謀內禪使朴不華喻意丞相賀太
平太平不荅復召至宮中親舉酒賜之達前說太平依違
而已帝亦知后意怒疏之兩月不見然后頗盜威柄殺罰
由已朴不華有罪被劾后諷御史大夫佛家奴爲疏辨佛
家奴謀再劾后卽嗾御史轉劾佛家奴謫潮河后族奇氏

在高麗者怙勢驕橫國中高麗王屢戒不悛怒盡殺之后與太子謀復讐乃詔廢高麗王立其弟塔思畱京師者爲王以奇族子三寶奴爲元子同知樞密院事崔帖木爾爲丞相將萬人并倭國兵送之至鴨綠江爲伏兵所殲餘十七騎還會御史大夫老的沙與太子有怨奔孛羅帖木爾于大同軍中孛羅匿之詔索不遣太子乃矯詔暴其罪命太尉擴廓討之孛羅遂再舉兵犯闕以討誅丞相朔思監及后宮中宦者朴不華爲名太子出奔太原孛羅言后多撓國政宐出諸宮外帝弗聽遂矯制幽於諸色總管府使其黨姚柏顏不花守之尋逼后入宮取印章爲書以召太子復幽后舊所后數納美女求脫又許妻以公主孛羅尙以箴送爲遲乃令先嫁女而後補箴贈始釋還宮旣而孛

羅誅太子還后又密令擴廓以重兵擁太子入京師脅帝
禪位賴擴廓不從而止會弘吉刺皇后崩中書省請后正
尊位又奏改資政院爲崇政院兼主中政院帝初不許俄
授冊寶進爵奇氏三世爲王時至正二十五年十二月也
先是元統間立第二皇后時監察御史李泌言世祖有誓
子孫不得與高麗女共事宗廟陛下踐世祖之位何忍忘
世祖之言乃以高麗女竝位中宮今災異屢起河決地震
盜賊滋蔓皆陰盛陽微之漸乞仍降爲妃庶使三辰定位
災異可息元初稱西夏高麗不舉其國而舉其部曰唐兀
氏肅良合氏至是乃以后爲肅良合氏詔天下二十八年
明兵破大都從帝北奔順帝多內嬖佩貴妃印者不下數
十取寵者七人曰龍淑妃尤侈黷帝賜繒綺珍異動鉅萬

計妃令宦者貨於左掖門內京師巨室富商售者輻輳名其地曰繡市帝日娛樂無厭後昵番僧穢德彰聞益甚奇后深疾之故欲內禪其子冀拯帝失以匡國計而坤道無成天運舛錯反以召亂順帝末年日在宮中乘龍船泛月池池上起浮橋三處每處分三洞洞上結綵爲飛樓樓上置女樂橋以木爲質飾以錦繡九洞不相直達每遇上已日令諸嬪妃祓於內苑漾碧池池用紋石爲質以寶石鑲成上覆紫雲九龍華蓋四面施錦幃跨池三石橋上結錦爲三亭又設一橫橋接三亭之上以通往來禊畢則宴飲於中池旁有香泉潭是日積香水注池中爲嬪妃浴澡之所帝在位久怠於政事荒於遊宴以宮女十六人按舞名爲天魔舞首垂髮數辨戴象牙冠身披紫纓珞大紅綃金

長裙襖各執加巴刺般之器羣女奏龍笛鳳笙以和之每宮中讚佛則按舞奏樂雜以男女妖冶百出內外益大亂帝又於內院造龍船首尾長百有二十尺廣二十尺上有五殿龍身并殿宇俱五采金裝船行則龍首尾眼爪皆動若相遊戲又自製宮漏約高六七尺爲木櫃藏壺其中運水上下櫃上設西方三聖殿櫃腰設玉女捧時刻籌時至輒浮水而上左右列二金甲神人一懸鐘一懸鉦夜則神人自能按更而擊天生亡國之孽無事不能而獨不能爲君焉何哉

元史卷十六

列傳二

皇子諸王

元太祖吞并漠南北及回鶻遼東以後封其諸弟於東北封其諸子於西北取後蕩平慈嶺以西於是又封其諸駙馬於西域太宗因之亦以北方封皇子樹維城之固平時通貢聘頒歲賜有事徵其兵馬聽調遣遇國有大喪則必諸藩畢至推戴以定新君之位故史稱憲宗元年西方諸王某等東方諸王某等西方諸大將某等東方諸大將某等大合於闊帖兀阿蘭之地共推帝卽位於斡難河世祖中統元年車駕至開平親王合丹阿只吉率西道諸王塔察爾耶先哥忽剌忽爾爪都率東道諸王皆來會勸進攷東方諸王爲太祖諸弟次弟合薩爾大王封地在遼西薊

北三弟合赤溫大王封地在黑龍江以北今索倫地哈丹
卽其裔也四弟別里古台封地在斡難河老帳至元中立
城名曰肇州而南及廣寧乃顏卽其裔也五弟斡赤斤大
王封地在怯呂連河卽今克魯倫河是爲東方諸王其西
方北方諸王則太祖太宗諸子太祖五子自太宗睿宗外
長子朮赤封阿羅思兼欽察地是爲極西北地次子察合
台封別失巴里之地太宗七子長合失生海都次定宗次
闊端次闊出生皇孫失烈門次合剌察次合丹次蔑里蔑
里與海都皆叛於嶺北睿宗拖雷十一子自憲宗世祖外
次二忽覲都六旭烈卽平定西域者七阿里不哥其子乃剌忽不
花其孫則藥木忽爾與憲宗之第四子河平王昔里吉亦
與篤哇同叛於嶺北是爲西北方諸王而西域駙馬異姓

諸王不與焉其始藩封皆無國名惟稱某某大王及世祖以下皇子新建藩國或中原或南北邊徼始追封國初諸王以齊魯晉楚趙魏吳秦各大國其新封亦錫兩字嘉號而名實不符初憲廟大封宗室撻河以南關中洛陽爲一國盡封介弟世祖亦封皇子於長安營於素渰之西毳殿中峙衛士環列車間容車帳間容帳包原絡野周四十里中爲扃門譏其出入故老望之眙目怵心以爲威儀之盛古名王雄藩所未有蓋元初中原藩王居帳殿不居城中自中葉以後始漸同漢俗建宮邸城郭而制度亦不頒行故經世大典於藩封一門亦虛存其目而疆里世系歲祿貢獻之數皆莫之詳焉今條其世系於左

烈祖宣懿皇太后生四子長太祖次合薩爾次合赤溫次

斡赤斤又異母庶弟曰別里古台齊王合薩爾狼臂多力
善射幼時與太祖貧居斡難河爲同族泰赤烏所忌起兵
來執害太祖太祖偕母弟皆逃入山林合薩爾獨持弓矢
拒敵泰赤烏軍呼曰所索止鐵木眞一人汝何爲者乃去
之其後太祖漸強盛吞并諸部皆合薩爾總統士馬出爲
前鋒入爲後殿太祖嘗曰合薩爾之射別里古台之勇皆
我所籍以取天下也克烈部之戰合薩爾別居哈刺渾山
妻子被虜獨與幼子走見月而行枕土而臥探鳥卵而食
自歸太祖於班朮河佯遣使乞降於王罕而潛師從之遂
滅克烈部迨太祖定漠北帝和林分資子弟合薩爾得四
千人太祖有舊臣蒙力克者恃恩驕恣有七子一爲巫號
帖卜騰格里毆合薩爾合薩爾訴於太祖太祖方以他事

怒謂曰爾平日自謂無敵今何被人毆合薩爾泣起去三日不朝帖卜騰格里譖於太祖曰長生天神來告初令鐵木眞管百姓再令合薩爾管百姓若不蚤圖事未可知太祖信之卽夜親往合薩爾帳執之太后聞之急駕白駝車馳至太祖已去合薩爾冠帶嚴詰之太后立命復其冠帶踞坐盛怒出兩乳置膝曰汝弟何罪而自殘骨肉邪爾小時飲我左乳合赤溫幹赤斤兩兒飲不盡一乳惟合薩爾并飲二乳使我胸臆寬快故爾鐵木眞多才智合薩爾有氣力能射凡四方叛逆之人皆以弧矢威服之今高鳥盡良弓藏欲除之邪太祖跪謝罪起事乃解然猶密奪其部眾大半止與千五百人太后憂悶合薩爾左右親信多畏禍逃去金貞祐元年癸酉太祖八年也分兵三道攻金帝

自將中軍由河間衛輝趨山東皇諸子將右軍取太行以南河北諸郡合薩爾及斡陳那顏等將左軍沿海取關外大寧及女真地命曰彼若降附卽沿彼中邊郡由烏刺江納浯江沂討浯河而歸如不降卽縱兵攻之合薩爾取金北京東京於是金始興根本地皆爲我有又從征西夏合薩爾破布納刺等城自後太祖令諸子征西域令諸弟斡赤斤鎮守漠北老營別里古台鎮守遼東命木華黎征金國惟合薩爾不令掌兵權故戰功末年不甚著太祖分封諸弟於東北合薩爾分地在遼西大寧而以濟南等地爲其食邑故其後人封淄川王後改曰齊王世祖之世東方北方叛藩數起皆太祖太宗親支獨淄川王後無反側論者以比長沙王國小取忠之驗然自元末其後裔支條雲

布甲於諸藩至今蒙古兩科爾沁部札賚特部杜爾伯特部郭爾羅斯部茂明安部阿拉山部青海和碩特部及四子部落凡九大部皆其後與太祖苗裔等

遼王幹赤斤一曰鐵木哥

一作帖木格一作格勒圖

太祖第四弟也太

祖稱帝和林時分賚諸弟而季弟與母后合得萬人自齊王被譖後國人畏帖卜騰格里之勢黨與日眾幹赤斤帳下人亦往投之幹赤斤遣人索之不與反受笞幹赤斤自往復被其兄弟圍窘脅令跪服而後釋之幹赤斤晨哭訴太祖於帳中太祖未語弘吉刺皇后曰豪奴妖巫前撻合薩爾今又跪帖木格陛下在位諸弟如檜柏長成尙踐踏無忌日後兒子幼小此輩虎狼尙可制邪太祖曰任吾弟處之於是幹赤斤出預伏力士適蒙力克率七子來御帳

斡赤斤佯請與帖卜騰格里角武藝牽出門外三力士禽去拉脅死之蒙力克與六子攘臂塞門洶洶欲爲變太祖驚起還宮翌日宣蒙力克父子之罪以前有免九死之詔宥之而勢燄遂熾太祖征西域命斡赤斤守和林其子孫初封壽王後封遼王亦封西寧王其分地在怯綠連河子孫各八人曾孫十三玄孫九而曾孫耶不干從乃顏叛於世祖之世六世孫脫脫復乘泰定卽位將赦前以仇殺宗王妃主百餘人奪其貲產其子八都復剽掠於至順之世南臺御史言遼王子孫世爲叛逆蓋因所封地大物眾所致請畱其王號徙族遠方而析其元封地不果行今蒙古翁牛特部斡赤斤後也

定王別里古台太祖異母弟也幼時同居斡難河適蔑里

吉部兵來尋仇全家急奔布爾罕山家惟五馬太祖兄弟
奉母各乘其一惟弘吉刺夫人及別里古台生母無馬爲
敵所獲及太祖乞師奪回弘吉刺夫人而庶母不知所在
別里古台長而偉軀多力從太祖平諸部落掌從馬國法
常以腹心掌之嘗從宴斡難河有從叔布里孛闊者爭馬
斫傷別里古台之背左右各持馬乳幢而鬪太祖大怒欲
攻之別里古台曰臣雖創甚幸未死今將舉大事柰何以
臣故而仇族人太祖攻塔爾部虜其四奧魯以歸復欲盡
誅其四種人以報祖父世仇別里古台漏言於是塔爾部
據險固守太祖怒令自後有大謀議不令別里古台入聞
然以掌從馬故無戰不從輒先陷陳嘗立爲國相又長達
魯花赤賜以蒙古人三千戶以廣寧路恩州二城戶萬有

千六百爲分地建營帳斡難河後又加賜信州路及鉛山
州二城戶萬有八千其子孫初封廣寧王後加封定王生
子三曰耶速不華曰叩溫不華曰罕圖忽耶速不華子曰
爪都中統初以推戴功封廣寧王孫曰乃顏至元中以遠
東叛世祖親征禽誅之叩溫不華當太宗世領兵攻金河
南屢立功張德輝對世祖曰請遣族人之賢如叩溫不華
者使掌兵柄其爲物議所推如此子二曰蔑里吉台曰雍
吉刺台罕圖忽從憲宗征伐攻蜀之釣魚山還及河南招
撫流民皆有功子曰霍歷極以疾廢不能從軍世祖俾居
恩州以統其藩人至大三年卒子塔出嗣好學通經史能
撫恤其下今蒙古阿巴噶部阿巴哈納部皆別里古台後
吳王合赤溫太祖第三弟也太祖西征時命守斡難河庭

帳其子按只吉台封濟南王孫四人長哈丹從乃顏叛於世祖之世別有傳季孫朵列納皇慶中封吳王曾孫四人封隴王吳王濟南王濟陽王玄孫二封濟南王西寧王至順三年同諸王荅都等入朝此皆太祖親諸弟也此外又有訶額倫太后養子四人皆攻伐各部所得奇兒曰曲出者蔑爾乞部人曰闊出者別速部人曰失吉忽圖者塔爾部人曰博爾忽一作字羅忽主爾乞部人四人者太祖皆弟畜之及長成皆立功及帝卽尊位和林失吉忽圖求封賞太祖曰爾爲我第六弟與我親弟一例國事與汝共之何必急一封賞而博爾忽沈勇善戰爲四傑之一尤有知名又太祖幼時有異母弟別克帖爾與太祖漁獵奪所彈雀及金色魚太祖怒異日遂伺隙刺殺之爲太后所怒詬比

之如海東青孤影無伴云

太祖皇帝六子嫡長子朮赤大王次察合台太王次太宗皇帝窩闊台次拖雷大王追尊曰睿宗皆弘吉剌皇后出也又有他妃所生庶長子曰兀魯赤攻金西京雲中時陳亡其妃改適金降臣劉伯林之子故皇長子無後又次闊列堅大王亦無攷太祖十四年將征回回耶速皇后以道遠倘有不諱四嫡子內誰可嗣大事宜先示國人知之太祖會諸臣問長子朮赤何如次子察合台對曰嗣大位者必服人心我母爲蔑里吉部虜去時歸而生朮赤何可令承大統以疑眾心太祖默然大臣博爾朮木華黎曰皇次子是何言也當爾未生時各部擾亂父母不幸罹患難今賴天祐立大業柰何言此以傷母心察合台曰臣非敢有

爭心也三弟窩闊台敦厚可屬大事請立三弟而臣等兄弟同心禦侮以輔之太祖復問朮赤問拖雷皆對如察合台言復問窩闊台對曰父母恩之兄弟愛之何敢以不材辭臣當盡力謹慎從事但恐後嗣不肖難以承繼太祖乃曰天下疆土甚闊爾兄弟各有封國但能親睦不忘今日之言何患不濟若慮後世不肖我子孫甚多豈無一賢擇眾所戴而立之可也遂定議以皇三子窩闊台爲嗣太宗立七年平定西域以葱嶺西北地封兄朮赤建庭於阿羅思兼轄阿速欽察二部地去京師將二萬里驛傳急行二百餘日方達京師故其山川郡邑風土莫之詳焉朮赤七子長拔都次散里荅三芒哥四蒙哥五脫脫六伯忽七月祖伯兄弟迭嗣後至元末月祖伯薨始傳其子札尼伯而

伯忽於世祖至元間爲札魯忽赤之長脫脫於至大二年以推戴功封寧肅王其子寬徹亦嗣封肅王初月祖伯於至元二年遣使求分地歲賜以振給軍站京師元無所領府治三年中書請置總管府給正三品印其位下舊賜平陽晉州永州分地歲賦中統鈔二千四百錠自至元五年己卯歲始元末國漸衰弱其阿羅斯舊裔遂起兵海隅計由之地自立爲汗盡驅蒙古出境故今阿羅思非復元裔云

察合台封天山南回疆建庭於葉爾羌卽古莎車地而以回疆諸城分王其子皆以葉爾羌爲大宗察合台二子長曰耶速蒙哥無後次曰合剌旭烈生四子一曰阿魯忽封幹端城一曰巴剌封哈失哈爾

卽今喀什哈爾

其子買住韓封克

王一日威遠王阿只吉封阿克蘇其子忽都帖木爾襲爵其孫圖剌封越王一日帖木爾不華封烏什其子南荅失里四支中惟阿魯忽叛於幹端故世祖命諸王合班元帥芒古台率師征之遂置幹端宣慰司元帥府仁宗延祐中幹端地復有叛者遣鎮西武靖王搠思班率兵討之其威遠王阿只吉則屢統大軍以禦漠北之叛甚著忠順而其孫越王圖剌亦不以功名終初成宗之崩也左丞相阿忽台等謀擁皇后稱制擅柄仁宗歸自懷孟中外洵洵仁宗以圖剌有勇力引之入內縛誅奸相以功封越王賜金印以紹興路爲其分地而圖剌居常怏怏怨望至大元年武宗幸涼亭將御舟圖剌前止之曰語有之一箭中麋毋曰自能百兔未得未可遽止此蓋蒙古舊俗儕輩相靳之語

而圖刺施之御前武宗心不平既而大宴萬歲山圖刺醉起解帶擲地噴目謂帝曰爾所與我止此邪帝疑其有異志二年春命楚王牙忽都丞相脫脫等鞫之辭服遂伏誅察合台子孫世長回部元亡以後尙傳國二十五世至

國朝順治初有葉爾羌之阿布都勒汗上表自稱成吉思

汗之孫承蘇勒坦業九子分治九城哈密土魯番皆其所

轄而以葉爾羌酋爲大宗蘇勒坦者回部王號也

蘇勒坦明史作

速魯檀元史作算端一作算灘一作斯坦一作土丹皆汗王之稱譯音無定字康熙二十一年北

路瓦刺部準噶爾強盛始繫元裔阿布都實於山北三十

五年王師敗準噶爾詔釋元裔由哈密歸葉爾羌自後

汗位遂絕乾隆平定西域時黃廷桂奏吐魯番無復蒙古

裔瓜州回民願歸故土納貢賦云

拖雷太祖第四子太宗母弟也當丁亥之秋太祖崩時太宗尙畱霍博之地拖雷身攝國事者年餘鎮撫內外人心安堵己丑夏往迎太宗於忽魯班雪不只之地秋太宗始至和林會喪八月卽位二年庚寅秋從太宗伐金破天成堡拔蒲城縣聞金平章完顏合達參政伊刺蒲阿守陝西遂渡河攻鳳翔先鋒戰不利太宗援之合達乃退三年辛卯鳳翔旣下拖雷用降將李國昌之計言於太宗曰金主遷汴恃黃河潼關爲固若出寶雞入漢中不一月可達唐鄧金人聞之得不謂我師從天而降乎太宗大喜語諸王大臣曰拖雷之計上符皇考遺命不待再計矣遂決策太宗以中軍南下破河中府由河清縣白坡渡河向洛陽進斡陳那顏以左軍由濟南進而拖雷總右軍自鳳翔渡渭

水過寶雞入小潼關涉宋境沿漢水而下俟金兵全力南拒拖雷而中軍左軍乃乘閒南渡黃河期以明年春會汴遣朔布罕詣宋假道且約合兵宋般使者拖雷大怒曰彼昔遣苟夢玉來通好何遽殺我使臣且食言非信背盟非義棄好非仁忘仇非勇吾師有名矣乃分兵攻宋諸城堡長驅入漢中進襲四川陷閬州過南部而還遂由金取房金人聞之盡撤守關防河之兵南守漢江拖雷破金兵十餘萬於武當山趨均州乘騎浮渡漢水謀報金大將完顏合達及伊刺蒲阿設伏二十餘萬於鄧州之西據隘以待時拖雷兵不滿四萬得報卽悉畱輜重輕騎以進十二月丙子及金前鋒戰於禹山佯北入林以誘之金人不動拖雷遂舉火夜進以精騎三千殿後晝夜不解鞍合達退保

鄧州攻之三日不下俄引而北合達等合步騎十五萬蹕其後我軍且戰且行與之相持彼進我退彼退我進以迭擾之毋令得休息食飲四年春正月距鈞州三十餘里連日大雪深數尺南軍不耐寒皆僵凍無人色不能舉刀槩然圍我軍數重諸將欲俟太宗渡河大軍至夾攻拖雷恐敵入鈞州城則難制遂乘雪夜突圍奮擊於三峯山大破之追奔數十里資仗委積

案禹山鈞州三峯之戰金元二史所載互異或云金兵尾金兵

之後或云金兵尾元兵之後或云金兵爲元所圍或云元兵爲金所圍或云元兵爲金所圍或云元兵爲金所圍

俟北路兵至即先破敵餘眾潰走睢州伏兵起又敗之合傳聞異辭今不能定也

達僅餘數百騎走鈞州蒲阿走汴皆追獲之太宗軍至按行戰地顧拖雷曰微汝不能破敵神速如此從太宗拔鈞州又拔許州遂定河南諸郡四月以天將暑雨班師北渡

由眞定過中都出北口避暑於官山五月太宗暴疾失音
六月病益甚師巫卜言金國山川神以般戮過多爲祟惟
親人可代之拖雷禱於天地請以身代又取巫覡禳祓之
水飲焉居數日太宗疾果愈北還中途拖雷薨壽四十有
□妃怯烈氏子十一人長憲宗次四則世祖也自拖雷以
身代太宗之死而元世有天下者皆其子孫憲宗初追諡
英武皇帝廟號睿宗二年合祭天地以太祖睿宗配享世
祖至元二年以英武之諡與太祖聖武相近改諡景襄皇
帝

太宗皇帝七子長合失早卒

舊史誤以合失爲第二皇后
五此從陳桎續通鑑

二皇后

昂灰所生也次定宗皇帝諱貴由次三子闊端次四子曲
出次五子合剌察皆六皇后乃馬眞氏所生也次六子合

丹次七子蔑里七皇后所生也次子三子四子雖屢從征

伐帝皆謂不堪屬大事嘗子養皇弟拖雷之子蒙哥爲子

謂可嗣大統及四子曲出早卒曲出之子昔烈門曲出一

昔烈門一作失烈門亦帝所屬意元史諸王世表云憲宗紀稱太宗

經世大典帝系篇及歲賜錄並無月良名字次序故不列

於表云云案太宗七子使僅月良一人不材何不立他子

而命立皇孫其後定宗嗣位果庸昏則諸子皆不當太宗

意可知已后妃傳又云定宗崩其子抱幼子昔烈門不知

昔烈門乃曲出之子非及太宗崩乃馬眞皇后臨朝以私

意立其子爲定宗三年崩復議所立未決又閱三年定宗

后擁皇姪昔烈門垂簾聽政者六月人心不服始立憲宗

自是太宗子孫遂無繼尊位者皇長子合失是生海都封

於北方海都子世封汝寧王定宗皇帝三子長忽察次老

忽台次和忽台封南平王其分地在阿力麻里皇三子闊

端生五子至孫封汾陽王其後改封荆王其分地在甘肅
永昌至正中荆王脫脫木爾歿後無嗣人畜時被西番劫
掠遂罷不封改置永昌等處宣慰司都元帥府皇四子曲
出薨於太宗八年子昔烈門太宗嘗命爲皇太孫六皇后
曾抱以臨朝至是失嗣有怨言憲宗遷之邊地昔烈門子
曰孛羅赤其孫世封靖遠王襄寧王皇五子合剌察生一
子脫脫有二孫皇六子合丹生五子長子覲爾赤卽篤哇
也一作都阿至孫封隴王亦封於北方皇七子蔑里生一子脫
忽世封陽翟王亦封於北方自憲宗世祖以旁支入嗣大
統太宗子孫分遷各地合丹於別什巴里今烏魯木齊蔑里於
葉爾的石河慈嶺西地海都於海押立地當在金山以北今別屬俄羅斯東境
爾哥於曲爾只地人與地均未詳脫脫於葉密里地脫脫卽合剌察之子也葉

密里卽今蒙哥都於闊端之西此闊端之子也闊端分地在甘肅永昌舊史誤作擴

昔烈門及耶速孛里等於沒脫赤之地及世祖至元初

而海都蔑里篤哇三王竝叛於北方征戰五十餘年始降

服而蔑里之裔陽翟王阿魯輝復叛於順帝之世

見叛王傳

論曰朮赤察合台舍己而推讓太宗拖雷以弟代兄之死

友于家法不減三代太宗既有知子之明其時憲宗世祖

皆以皇弟子專征功著中外乃不念拖雷金滕之勳以天

下讓其弟之子而必貽之皇孫昔烈門何哉山陵崩坼天

下朝覲謳歌者不之太宗之子而之睿宗天報忠孝不於

其身於其子孫神器其可以人力爲哉然猶啟海都篤哇

蔑里兵爭數十年之禍則太宗與子與賢不明有以致之

也

元史卷十六

列傳

主

拖雷大王十一子長憲宗皇帝蒙哥次二忽覲都次四世
祖皇帝忽必烈次六旭烈一作旭烈兀次七阿里布哥次八撥
綽次九末哥次十歲都哥次十一雪別台第三第五失其
名忽覲都無嗣旭烈征西域拓地萬里取有功世王印度
之地語詳征西域傳其裔在內地者別封靖遠王廣平王
改封幽王阿里布哥之長子封威定王其孫分封魏王冀
王定王鎮寧王其後裔亦封燕王撥綽之孫封楚王末哥
之孫封永寧王歲都哥世封荆王雪別台封爵無攷有二
孫見世表

楚王牙忽都者睿宗庶子撥綽大王之孫也睿宗妃乃馬
眞氏生撥綽驍勇善騎射憲宗命爲大將軍北征欽察有
功賜拔都號歲丁巳分土諸侯王賜蠡州三千三百四十

七戶爲其食邑撥綽生薛必烈傑薛必烈傑生牙忽都牙忽都年十三世祖命襲其祖父統軍至元十二年從北安王北征十三年失列吉即昔里吉叛遣人誘脅之牙忽都不從事王益忠謹入魯渾粘闡與海都通相率引去王遣牙忽都將兵追禽之未幾失列吉約木忽爾脫帖木爾等反以兵攻北安王生致牙忽都拘繫之牙忽都與王親臣那台等謀逃歸事覺復被繫困辱備至十四年兀魯台伯顏帥師討叛失列吉約木忽爾迎戰牙忽都潛結赤斤帖木爾土圖哈亂其陳因得脫走歸京師須髮盡白帝閔之賞賚甚厚至元十八年加封耒陽州五千三百四十七戶二十一年命與土圖哈同討海都牙忽都先進邏得其謀備知虛實直前衝陳破其精兵海都敗走得所俘掠軍民而還

詔賜鈔幣鎧甲弓矢其後北安王駐帖木爾河諸王乃顏及耶不堅有異圖耶不堅引兵趨怯綠連河大帳王遣闊闊出土圖哈率眾追之那懷之民擾攘不知所從牙忽都將三百騎進至阿赤怯地會王帳下遜篤思部兵逃去乃顏又誘蒙古軍二萬從己牙忽都知之夜襲其河上軍突入帳中遇忽都蔑爾堅幾獲之閒道逸去二十七年海都入寇時多爾朵哈方居守大帳詔遣牙忽都同力備禦軍未戰而潰牙忽都妻孥輜重駐布思哈刺嶺悉爲藥木忽爾明里即蔑里等所掠牙忽都與其子脫烈帖木爾相失獨與十三騎奔還世祖撫慰嘉歎賜爵鎮遠王塗金銀印賜以弘吉刺氏女厚資裝遣之復命納里忽徹徹不花往錫命其部屬同時被剽掠者以所籍故栢桑葛家財分賜之

又命牙忽都居北安王第二帳王薨帝命掌大帳固辭成
宗立命侍左右武宗撫兵漠北請以子脫烈帖木爾從大
德五年海都篤哇合軍入寇脫烈將千兵擁護先後力戰
功多在軍十年成宗崩安西王阿難荅與明里覬覦神器
牙忽都屢持正議折其非望誓不敢動武宗卽位以其父
子勞効忠勤進封楚王賜金印置王傳以叛王察巴爾親
屬賜之子脫烈封鎮遠王至大三年察巴爾來歸宗親皆
會牙忽都進曰太祖皇帝削平西北太宗憲宗世祖三朝
混一四海鞭長駕遠用建諸王以藩王室近歲間有違言
致宗室諸王幾成敵國賴列祖在天之靈默誘諸王之衷
西海拔都罕裔北海察巴爾王罔不內鄉來享來王中外
同燕一堂之上地大物眾有可恃者焉有不可恃者焉昔

我太祖有訓世祖誦之理亂絲者宜挈其綱櫛亂髮者宜束以繩治亂國者宜齊以法然後可以辨上下而定民志帝及諸王莫不改容悚聽身忽都卒脫烈帖木爾嗣楚王延祐中明宗西出脫烈坐累徙西番沒入其家貲之半明宗卽位制曰脫烈何罪其轉徙籍沒豈不以我故邪其復故號人民貲帑悉歸之脫烈帖木爾卒子八都孫燕帖木爾嗣其爵

憲宗皇帝五子長班圖次阿速台次玉龍荅失

一作玉龍
失一作

玉龍塔思

次昔里吉次辨都憲宗八年皇子辨都薨於吉河之

南無嗣其班圖阿速台後人及封爵亦無攷惟玉龍荅失子封衛王孫封郟王昔里吉封河平王其孫封嘉王憲宗既舍子傳弟諸子心頗不甘世祖十四年昔里吉復執皇

子北安王應海都以叛於阿力麻里世祖遣丞相伯顏率軍破之爲宗王沙里蠻執以出降故憲宗後嗣亦不振

世祖皇帝十子長多爾吉次皇太子眞金三安西王芒哥

臘四北安王那木罕

一作南木合

五雲南王忽哥赤六愛耶赤

七西平王奧魯赤八寧王闊闊出九鎮南王脫歡十忽都

魯帖木爾多爾吉後人無攷芒哥臘爵僅再傳那木罕統

兵阿力麻里與叛藩攻戰連年亦無子忽哥赤傳子封營

王其裔孫封梁王世守雲南

舊史宗室表雲南王僅一傳營王而絕今從明史梁王傳

愛耶赤凡再傳奧魯赤統兵西北禦叛藩子封鎮西武靖

王孫封雲南王曾孫阿納特納失里天厯初以推戴功進

封豫王闊闊出爵一傳脫歡子孫世封鎮南王其別錫封

文濟王宣德王者皆脫歡子也又有封威順王宣讓王者

顯於順帝世別詳於後忽都魯凡再傳無封號

明孝太子諱真金世祖嫡子也母弘吉烈皇后少從姚樞寶默受孝經中統三年封燕王守中書令四年兼判樞密院事嘗從幸宣興世祖違豫憂形於色夕不能寐聞母后暴得風疾衣不及帶而遽行至元七年秋受詔巡撫稱海至冬還京與諸王札刺忽及從臣伯顏等閒坐令諸臣各誦所聞善言十年二月冊爲皇太子仍兼中書令判樞密院事九月詔立宮師府設官屬三十八員詔以侍衛親軍萬人益隸東宮太子命選其驍勇教以兵法時閱試焉嘗有疾世祖遣侍臣馳祀岳瀆山川太子戒其毋擾郡邑所服綾衾爲瀋所漬命加染治侍臣請更製之太子曰吾欲織百端不難願用物未敝豈宜棄之東宮香殿成工請鑿

石爲池如曲水流觴故事太子曰古有酒池肉林爾欲吾效之邪不許每與諸王近臣習射之暇輒講論經典及資治通鑑貞觀政要王恂許衡所述遼金帝王行事要略下至武經等書片言允愜未嘗不灑然改容王恂白棟等朝夕不出東宮按察副使王惲進承華事略二十門諭德李謙陳正心睦親崇儉親賢幾諫戢兵尙文定律正名革敝凡十事太子皆嘉納聞漢成帝不絕馳道唐肅宗改絳紗袍爲朱明服大喜曰使吾行之亦當若此及說邢峙止齋太子食邪蒿顧宮臣曰菜名爲邪食之豈遽令人不正邪張九思以古人防微示戒對嘗從王恂學書仿本親署學生某習書謹呈其敬慎如此中庶子必伯以其子阿巴赤入見太子問讀何書以蒙古書對太子曰何不習漢人文

字其亟入胄監至元以來天下太平人材輩出太子優禮遇之在師友之列者非朝廷明德則布衣節行之士命宋衛擇可備顧問者衛薦郭祐何瑋徐瑒馬紹楊居寬何榮祖楊仁風等太子盡令致之先自近者始遂召何瑋於易州徐瑒馬紹於東平楊仁風於潞州復以衛輝總管董文用練達政事與楊恭懿同置省中議事是時已立國子學辟劉因專領之而以宮僚李謙宋衛李棟等備咨訪嘗曰吾聞金章宗時有司論大學生廩費太多章宗謂養出一范文正所償顧豈少哉斯言可深長思矣初阿合馬擅國柄太子惡其姦未嘗少假顏色王著知阿合馬惟憚太子故假太子命夜召而殺之及和禮霍孫入相太子諭以便國利民者毋憚更張苟有撓者我當力持之中書啟以何

瑋徐瑒參議省事太子諭二人學孔子之道宜力行平生所學右丞盧世榮以言利進太子意深非之嘗曰財非天降安得歲取贏乎其後世榮果坐罪桑葛素袒世榮聞太子有言訖不敢救詔割江西龍興路爲太子分地太子謂左右曰安得治民如邢州張耕者乎於是召宋衛大選署守長江西行省以歲課羨餘鈔四十七萬緡進太子大怒曰百姓不足君孰與足盡卻之阿里以民官兼課司請歲附輸羊三百太子以其越例罷之劉思敬以新民六十戶來獻太子問民所從來以重慶俘獲對太子蹙然曰何不隨在放遣而重失人心爲烏蒙宣撫司進馬踰歲額禁之其大雅不羣本於天性中外歸心焉迨世祖春秋高臺臣言事者合疏請傳位太子太子聞之懼於是臺臣寢其奏

不上而小人疾臺臣者乘閒發之世祖怒甚太子益惶恐未幾遂薨年四十有三賜諡曰明孝太子成宗卽位追諡文惠明孝皇帝廟號裕宗祔太廟世祖以後諸帝皆其子孫

鎮南王脫歡世祖第九子也嘗奉命征安南無功歸世祖終身不見長子老章次子脫不華皆以次襲封鎮南王其諸子有別封威順王名寬徹普化者

一作不花

於泰定天厯至

正中鎮湖廣武昌宿衛親兵千五百名歲支米三萬石鈔三萬錠王子宮妃飲膳衣裝供億侈靡恣部下侵漁至正十二年徐壽輝起斬黃陷武昌寬徹普化棄城走十三年大軍收復武昌十六年以大艘四十攻賊將倪文俊於沔陽且載妻子以行至漢川閤淺爲賊火筏所焚室孥皆陷

寬徹普化走陝西欲之京師爲李思齊所扼俾屯田成州以歿子和尙侍從順帝左右帝出入與俱二十四年受密旨討孛羅帖木爾與儒士徐士本交結勇士陰圖除賊帝期以事濟放鴿鈴爲號明年秋竟斬孛羅延春閣下以功進封義土二十八年順帝命同淮王監國不知所終淮王者初封宣讓王名帖木不華脫歡第四子也脫歡子脫不花薨子孛羅不花幼故帖木不華代嗣爵鎮南及其長而上書讓還之朝廷改封宣讓王賜金印移鎮廬州命其王府官班列有司之右至正十二年境內賊起以所部兵從諸王分道平賊十六年與弟寬徹普化以兵鎮遏懷慶復調芍陂軍以拒潁賊渡淮及廬州不守乃孛身北歸京師二十七年進封淮王二十八年順帝北狩詔王留守監國

城破死之年八十有三

梁王把匝剌瓦爾密世祖第五子雲南王忽哥赤之裔也封梁王仍鎮雲南順帝之世天下多故雲南僻遠王撫治有威惠至正二十三年明玉珍僭號於蜀遣兵三道來攻王走營金馬山明年以大理兵迎戰玉珍兵敗退久之順帝北去大都不守中國無元尺寸地而王守雲南自若歲遣使自塞外達順帝行在執臣節如故未幾明師平四川天下大定明祖以雲南險僻不欲用兵明年正月北平守將以所得王遣往漠北使者蘇成來獻明祖乃命待制王禕齎詔偕成往招諭王待禕以禮會元嗣君遣使脫脫來徵餉聞有明使脫脫疑王貳心因齎以危語王遂殺禕而以禮殮之踰三年明祖復遣湖廣參政吳雲偕大軍所獲

雲南使臣鐵知院等往知院以己奉使被執誘雲改制書
給王雲不從被殺王聞雲死收其骨送蜀給孤寺明祖知
王終不可以諭降乃命傅友德爲征南將軍藍玉沐英爲
副帥師征之洪武十四年十二月下普定王遣司徒平章
達里麻率兵駐曲靖沐英引軍疾趨乘霧抵白石江霧解
達里麻望見大驚友德等率兵進擊達里麻兵潰被禽先
是王以女妻大理酋段得功嘗倚其兵力後以疑殺之遂
失大理援至是達里麻敗失精甲十餘萬王知事不可爲
走普寧州之忽納砦焚其龍衣驅妻子赴滇池死遂與左
丞達的右丞盧爾夜入草舍俱自經明祖遷其家屬於耽
羅元代分藩徧宇內各負尾大之勢百年間反者四起其
宗藩以忠節殿一代之者惟雲南梁王一人

世祖明孝太子眞金生三子長晉王甘麻剌卽泰定初追諡顯宗者也次二曰懷王荅刺麻巴剌卽至大初追諡順

宗者也

案舊史直呼荅刺麻巴剌之名從無封號惟武宗元年追尊皇考懷王爲帝則其封爲懷王明矣以

天子之父而舊史直呼其名始終不言何封謬野至此

次三曰鐵穆耳卽成宗皇帝

三子皆妃弘吉刺氏所生晉王少育於祖母昭睿順聖皇后日侍世祖無妄言至元中以皇孫出鎮北邊叛王藥木忽等望風請降而篤哇察巴爾諸王亦遣使求和邊境以寧嘗出征駐金山會大雪擁火坐帳內顧謂左右曰吾等帳處猶有寒色況從卒腰弓荷戟周廬之外乎遂命饗人大爲肉糜親嘗而徧賜之軍中有暇卽命耶蔑堅以蒙古語講通鑑二十六年世祖以其居邊久命獵於柳林率眾至鄯州撫循部曲而約束甚堅民以無擾世祖聞而嘉之

明年封梁王出鎮雲南過中山又明年過懷孟從卒馬駝
千百計所至安堵二十九年改封晉王移鎮北邊統領太

祖四窩里朵

一作幹
爾朱

及軍馬國土中書省臣奏言諸王皆

置傳今晉王守太祖肇基之地宜加置內史從之明年晉
王弟鐵穆耳爲皇太子又明年世祖崩晉王聞訃奔赴上
都鐵穆耳以皇太子嗣大位而晉王乃歸藩服大德六年
正月薨年四十諡獻武王性仁厚守禮爲朝廷所重惟崇
尙浮屠耗費無算子三人長耶孫鐵木爾次松山封梁王
次迭里哥不華封湘寧王英宗遇弒耶孫鐵木爾以晉王
嗣大統是爲泰定皇帝追尊王曰光聖仁孝皇帝廟號顯
宗祔享太室又六年文宗卽位乃毀其廟室
泰定帝四子長皇太子阿里吉巴立於上都數月而廢次

晉王巴的麻次小薛又次允丹藏卜皆早殞無後

皇次孫懷王荅刺麻巴刺晉王同母弟至元之初生於燕王邸二十二年皇太子薨皇次孫鍾愛兩宮優其出閣之禮二十八年始詔出鎮懷州至趙州從卒有伐民聚桑者杖懲之世祖嘉悅未至鎮以疾召還明年春薨於京師追封懷王年二十有九子三人長阿木哥封魏王次武宗皇帝又次仁宗皇帝方成宗之崩也德壽太子早薨無後成宗后謀稱制諸大臣潛使迎仁宗及母后弘吉刺氏於懷州監國而武宗尙以懷寧王總兵北邊未至太后以兩子星命付陰陽家推之擇所宜立對曰重光大荒落有近災旃蒙作噩長久重光武宗生年旃蒙仁宗生年也太后感之遣近臣密諭武宗武宗默然謂康里托托曰我捍北邊

十年又序次居長即使運祚有數但令設施合於天心民望雖一歲之短亦足垂名萬世何必以陰陽家茫昧之言而乖祖宗之託乎托托以聞太后愕然曰兩子皆吾所生豈有親疏吾爲皇子遠慮所以深愛皇子也皇子意旣如是其卽速來復命托托往報武宗行至中途遙望見托托至急召至前竝馬而行托托具言皇弟虛位迎待之意於是武宗始無疑至京踐位詔立弟懷王爲皇太子追尊皇考故懷王爲昭聖衍孝皇帝廟號順宗祔享太廟其追尊崇祀之瀆語詳禮志宗廟篇魏王阿木哥武仁異母兄也初仁宗篤友于之誼歲賜加厚諸王莫比皇慶初賜以慶元路六萬五千戶延祐五年以罪貶高麗術者趙子玉言於王府官屬以阿木哥名應圖讖潛謀備兵航海往高麗

取阿木哥事覺子玉等伏誅文宗時封阿木哥子爲西靖王又有襲封魏王者

論曰甚哉祀典紕繆未有如元代之甚者也憲宗初年追尊皇考拖雷爲帝廟號睿宗成宗初年追尊皇考故太子眞金爲帝廟號裕宗泰定帝元年追尊皇考晉王爲帝廟號顯宗武宗元年追尊皇考懷王爲帝廟號順宗皆入廟配天而曾居尊位之太宗憲宗兼有大功德者反不得預焉夫有天下者始得立廟漢宣帝旁繼昭帝終不列戾悼二園於昭穆光武中興繼統平帝終不尊南頓君於宗祖以其未嘗繼體而正宸極也元之諸君各顧私親專尊其所生於是僣尊卑溷昭穆瀆禮不經莫此爲甚泰定中博士等所獻宗廟同室異世議徒知兄弟當共爲一世而不

知顯順二考不當稱宗徒知父子各自爲世而不知睿裕二宗不當立廟況卽天子之位者謂之君其未嘗卽位者皆臣也徒知父子竝坐不合禮經而不知君臣同食尤不合禮經也又其甚者太宗憲宗皆創業之君功當百世不遷乃自世祖以後諸帝皆非太宗憲宗子孫遂并二宗不列廟祀則是未爲帝者可入廟稱宗而曾爲開創有功德之君反禋祀時享不及乾坤易位振古所無誠欲合禮則太祖居中太宗居西夾室定宗居昭之第一憲宗居穆之第一世祖居東夾室成宗居昭之第二武宗居穆之第二仁宗居昭之第三英宗居穆之第三太宗世祖百世不遷其餘親盡則祧各藏於其夾室而睿裕顯四神主各以王封祔食於祧廟如此則情文皆稱而禮制不僭濫矣末

哉元世之儒臣乎至順帝之弟懿璘質班年甫七歲一月而殤不但非未踰年之君乃亦入廟稱宗且追立皇后尤史冊未有之笑柄也

初武宗仁宗以兄禪弟而武宗長子爲周王和世琜仁宗長子爲英宗碩德巴剌原議再世亦兄弟相及先傳周王以授英宗及仁宗中年大臣鐵木迭爾等欲固寵乃搖惑太后陰譖周王於仁宗延祐二年錫封藩國明年三月命周王出鎮雲南是冬十一月周王行次延安陝西行中書省丞相阿思罕周王常侍府中衛都指揮使教化等及武宗諸舊臣皆來會曰天下者武皇之天下出鎮本非上意由左右攜間致然請以其故白之朝廷庶可杜離間不然事變叵測遂盡發關中兵分道自潼關河中府入已而平

章政事塔察爾中丞脫歡襲殺阿思罕教化等於河中周
王遂西行不赴雲南而赴金山與西北諸王會朝廷亦置
不問是冬遂立己子碩德巴剌爲皇太子四年正月頒詔
曰朕仰惟太祖皇帝聖訓若曰應天順人惟以至誠保安
天下重念列聖繼承丕祚我世祖皇帝混一中夏創業垂
統願予菲德懼弗克荷不遑寧處和世琰年屬幼弱聽信
憮人阿思罕等謀爲不軌構亂我國家已爲行省行臺管
軍官等禽斬叛賊其同謀者不忍盡誅宜推曠蕩之恩以
開自新之路可大赦天下

此詔仁宗本紀諱不書今從元

本紀亦諱不書據明宗本紀補入元典

章詔書和世琰爲忽世刺譯音不同也

三月以立皇太子

詔天下旣而仁宗崩太子立是爲英宗鐵失等復構徙周
王弟圖帖睦爾於瓊州及英宗被弑泰定帝以皇叔自和

元史卷十六

列傳

三

林入討賊繼大統元年卽以兄子周王和世琜自金山徙鎮和林代總北兵復召圖帖睦爾徙居建康又召至京師封懷王賜金幣徙江陵五年泰定帝崩其太子阿里吉巴卽位於上都年方九歲於是武宗舊臣燕帖木爾欺其冲幼舉兵京師議迎立武宗之子時周王遠在漠北乃先迎懷王於江陵懷王至先卽尊位是爲文宗文宗遣使迎周王於漠北遣兵圍執泰定帝太子於上都廢之周王卽位和林南還至上都中途爲文宗所害文宗立五年崩遺命仍立明宗之子妥懽帖睦爾時遠居靜江展轉逾年而後得立是爲順帝逾數年燕帖木爾及柏顏死順帝親政遂聲文宗弑逆之罪毀其廟主誅其后流其子蓋自仁宗惑奸佞之謀背金匱之約同宋太宗負藝祖之故轍易世而

後內禍相尋國統三絕論世者於武仁傳授之際不能無三歎焉

明宗二子長安懽帖睦爾卽順帝次子鄜王懿璘質班一作

亦憐眞班卽寧宗文宗子曰燕帖古思初明宗以周王鎮漠北

納回女罕祿魯氏生子安懽帖睦爾及明宗入嗣大統中

途遇害文宗并害其后八不沙氏而徙安懽帖睦爾於高

麗置大青島中不許人接且據其乳母夫言明宗在朔漠

時素謂其非己子命翰林學士承旨阿璘帖木爾書其事

於脫卜赤顏又命學士虞集草詔播告中外閱歲移於廣

西之靜江僧寺安置及文宗大漸時謂皇后及丞相燕帖

木爾曰往者旺忽察都之事是朕大錯悔之無及今惟有

迎立明宗之子庶朕見明宗於地下亦有詞以對見庚申外史

時靜江距京師遠而明宗次子懿璘質班近在京師方七歲燕帖木爾貪其幼弱先立之逾月卽殂廟號寧宗欲立文宗子燕帖古思年亦幼乃復迎妥懽帖睦爾於海南年十三矣燕帖木爾以曾預逆謀恐其修明宗舊怨遲久不立逾數月燕帖木爾死方立議萬歲之後傳位於燕帖古思如武宗仁宗故事後至元六年下詔毀文宗廟主誅逆黨諸臣并逮草詔之翰林學士虞集至京治罪集呈文宗手改詔草乃免遂安置文宗后不荅失里於東安州流燕帖古思於高麗以申不共戴天之憾而民間流言因緣前詔證成事實元末有大行隱士權衡者著庚申外史謂順帝本宋末帝瀛國公之子瀛國降封後奉命爲僧於甘州納回回郡王女罕祿魯氏有身周王過其地見氏愛而納

之俄生子是爲順帝又有謂瀛國生子後適明宗從北方色得之因乞爲子者此則先生後納尤非情實文宗氣卽物順帝年已十三明宗殂時順帝年已八歲計其生時明宗方二十二歲豈遽憂無嗣而乞養他人之子乎此宋遺民嫉謗勝國之詞傳會文宗初詔不可爲典要然文宗初詔正當其仇兄滿姪弒嫂之時果知爲瀛國之子豈有不昌言其實而但言明宗自謂非己子竟不言何人之子乎且臨終顧命諄諄傳以天下是己明知前詔違心之語鑿空難誣豈真肯以祖宗大統傳之異姓乎閩人余應及浙人楊維禎紀事詩皆沿襲前說傳爲疑案

論曰仁宗不立周王爲太子而傳位英宗雖失信於兄然仁宗先靖內難清宮擁戴武宗之天下仁宗授之較宋太宗坐受太祖禪讓而反私其子戕其姪者固爲有閒周王出鎮之役苟不願往雲南而願往漠北則自請於仁宗可也中途發兵逃往金山則誤聽宵小之言同叛據之迹仁宗置而不問本紀諱而不書則亦慚德於斯君臣兩失矣

周王兄弟果早懷不服何不舉兵於英宗嗣位之初何不舉兵於泰定入紹之日既相安無事十四五載受其徙和林徙江陵之德於生前而忽反戈於身後胡粹中但知責周王之叛仁宗不可以君天下而不知文宗之叛泰定尤不可以君天下乃謂文宗入立即當正以大義而廢之不當讓位於周王爲不知春秋之義致受首惡之名夫仁宗可以廢周王文宗身叛泰定何以罪周王乎魯隱守菟裘之志而桓弑之衛叔武有被髮之迎而獻賊之文宗親弑其兄弘吉剌后親弑其嫂且詔告天下謂順帝非明宗子此何等心事豈能舍子傳姪者哉將死哀鳴忱於因果悔旺忽察都之事立明宗之子以自解而置前詔於不問又值燕帖木爾柏顏逆黨柄政之時故其草尊皇太后詔有

親挈大寶付予兄弟後其所生之語使柏顏等一日不死則順帝復仇討賊之志一日不得申乃胡粹中願謂弘吉刺后舍子授姪至公至誠而以順帝之信讒廢黜爲萬世罪人是則爲順帝計當懷其擁立私情而置不共戴天之仇於不問乎惟知以天下爲利而不知父子君臣之大義以此續通鑑綱目春秋之誼掃地乾坤或幾乎息矣

順帝太子愛猷識理達臘皇后奇氏所生以至正十三年冊立爲皇太子性聰明英果帝立端本堂使李好文貢師秦教太子以漢人文字近侍輒臂鷹至廊廡閒飛放馳逐欲誘出游太子令左右戒之曰師傅在前予方聽講爾輩安敢狎侮如是然諸人講解不出章句不足收納牖之益其後至正二十二年太子嘗坐清寧殿分布長席列坐西

番高麗諸僧講佛經太子曰李先生教我儒書多年尙不省其誼今聽佛法一夕卽能曉焉是頗崇佛學時帝納西僧習祕密法出入宮闈太子深疾之陰與皇后謀內禪丞相太平不可及爲孛羅帖木爾所偏奔擴廓帖木爾徵畿輔兵至太原軍容甚盛太子欲效唐肅宗自立靈武故事擴廓不可及旋京師又自請出征總天下兵討賊帝不許其後屢置撫軍院於京師卒不果行至正二十八年明兵至通州太子隨帝北行逾二年順帝殂於應昌距上都三百餘里國人謚曰惠宗太子嗣立改元宣光號北元是年明兵襲應昌太子從數十騎遁去明將李文忠獲皇孫邁的里巴剌并其金印歸獻俘明太祖曰元有天下百年朕祖父亦享其太平安忍僂辱封爲崇禮侯畱京師五載

厚禮而歸之太子在位凡十一年殂諡曰昭宗時洪武十三年也昭宗後傳位於其子脫古思自後屢傳皆一二載卽被弑帳下不及萬騎見洪武二十年還元幼主詔書

陽湖趙翼曰金元二代立皇太子皆不吉攷之於史金初

制度未立其襲位也多兄弟叔姪互相傳襲太宗熙宗亦

以安班貝勒

舊名諱班勃極烈

嗣位安班貝勒者取尊官也然太

宗以弟繼兄熙宗以從孫繼叔祖皆未嘗立爲皇太子也

熙宗始立子濟安爲皇太子未幾薨海陵立子光英爲皇

太子海陵被弑光英亦遇害世宗先立允恭爲皇太子未

卽位薨

世宗曰朕子雖多皇后惟有太孫一人乃立其子璟爲皇太子

衛紹王立子從恪

爲皇太子紹王被弑從恪亦禁錮二十餘年汴京之變崔

立立爲梁王降元被殺於青城宣宗立子守忠爲皇太子

三年薨後又立子守緒爲皇太子是爲哀宗竟亡國統計
金源所立皇太子竟無一享國者元自太祖以下皆未立
皇太子至世祖始立珍戩一作眞金爲皇太子未卽位薨仁宗
立英宗爲皇太子卽位後被弑於南坡泰定帝立子喇實
晉巴舊名阿速古爲皇太子甫登極卽敗廢文宗立子喇特訥
達喇舊名阿刺忒訥答刺爲皇太子未幾薨順帝立子愛裕實哩達
喇舊名愛猷識理達臘爲皇太子未卽位國亡有元一代所立皇太
子亦無一享國皆事之不可解者也惟元武宗立弟仁宗
爲皇太子明宗立弟文宗爲皇太子後俱爲帝以弟傳子
轉得享國尤屬異聞何哉請以質之讀史尙論者